



Мана, Ислом уммати муборак Рамазон ойи келишини интиқлик билан кутмоқда. Сиз ҳам эй ёш-навқирон биродарим, мана шу умматнинг бирисиз. Рамазон ойининг кириб келиши мени кўп ўйга солди. Ички бир ҳис мени Рамазон билан табриклаш, бу улуғ ой билан муборакбод этишга ундади. Бироқ кўнглимда кўп орзулар кезиб юрарди, шу табрикни кимга, кишилардан қайси тоифага йўлласам экан, дердим. Ўйлаб туриб, умид ёшларда эканига инондим. Аллоҳ таолодан кейин улар зафарга эришишда ўз умматларига кўмакчидирлар.

Мен ушбу рисоламни ёш дўстларим билан менинг ўртамда садоқат гарови бўлишини умид этиб ёздим. Шунинг учун рисоладаги мурожаатларимда кўп орзуларим умматнинг мана шу тоифасига қаратилди ва ушбу нидоларим юзага чиқди:

Навқирон биродарим! Ушбу илк танишувда сиз билан йўлак четида, тўп ўйин майдонида ёки интернет кафеси-ю биллиардхоналарда



Ислом Нури

учрашишга мажбур бўляпман. Токи Рамазон ойи ташрифи муносабати билан дилимда кечган, бутун туйғуларимда яшаган сизнинг улуғ шахсингизга бўлган муҳаббат шуурларимни ўзингизга баён этишим учун вақтингиздан озгина берасиз, ажратасиз деган умиддаман. Сиз гапимни эшитаркансиз, ё сўзларимни ўқиркансиз, умид қиламанки, мақсадли сўз эшиги орқали мулоқатингизга мени етаклаган нарса фақат муҳаббат туйғуларигина эканини илғагайсиз.

Навқирон биродарим, эҳтимол шу кунларда бу муборак ойнанинг истиқболига ошиқ бўлганларнинг ҳиргойиси қулоғингизга кўп чалингандир. Эҳтимол кўпчилик мусулмонлар лабларидаги табассумни ва бу улуғ меҳмон истиқболига бўлган шодиёна тайёргарликни ўз кўзингиз билан кўргандирсиз.

Сиз: “Нима учун бу ҳиргойи? Бу табассумларнинг асл сабаби нима? Бу ой оламида нима янгилик нарса борки, бунчалик тайёргарлик кўрилса?” деб сўрарсиз.

Сизнинг ҳаққингизданки мен сизга ушбу сўзларни айтсам:

Ҳақиқатан Рамазон ўз хусусиятига эга бир ойдир, ўз фазлига молик вақтдир. Ўз қадру қиммати бор бир замондир. Бу ой тўғрисида озгина фикр қилсангиз эди — Аллоҳ сизни Ўз ҳифзу-ҳимоясига олсин — Рамазон сирларидан баъзиси олам-олам қувонч ва шодликка элтишини идрок этардингиз.

Навқирон биродарим, Рамазон келди. Энди ўтган Рамазон билан бу Рамазон ўртасида бир фикр юритиб кўринг. Неча-неча одам бу дунёдан кетди. Кунларни бирга ўтказган қанча қанча биродарлар охират оламига кетдилар. Бугун улар қабрда гаров ва зулмат



Ислом Нури

асирларидир. Азиз биродарим, нақадар муносиб ишки ана шундай кетишдан олдин ўзингизни текшириб, эътибор берсангиз. Чунки вақт бизга кўрсатдики, ана ўшалар кўп орзулар билан яшардилар. Кўп истакларининг рўёбга чиқишига ҳаракат қилардилар. Шу орзулари ва истакларининг баъзисини ҳосил қилиш учун Рамазонни кутардилар. Бироқ ўлим уларга орзуларининг ушалишидан кўра тезроқ келди. Қазою қадар уларга кутилмаганда ҳужум қилди. Дорулбақога кўчиш тўсатдан содир бўлди.

Барчалари ўз жойларига жойлашдилар. Баъзилари хурсанд, шод. Улар учун жаннатга эшик очилган, жаннатда барча орзу қилган нарсаларини кўриб: «Илоҳо, қиёматни тезлат!» дедилар. Бошқалари эса қабр уларга торайиб, қовурғалари бир-бирига кириб кетган, энг ёмон ҳамсуҳбат ёнида яшайди. Жасадига осилган илону чаёнлар манзарасини ўз кўзи билан кўриб: «Илоҳо, қиёмат бўлмасин!» дер.

Навқирон биродарим, юқорида мен зикр қилиб ўтган кишилар дунёдан кетдилар. Аҳлу қариндошлари уларни эсдан чиқарди.

Яна кимларгадир Рамазон келди-ю, бироқ улар даҳшатли автоҳалокатларга учраган ҳолатда уни қарши олдилар. Улар оқ каравотларда михланиб ётганча кун ўтказадилар. Йиллаб қуёш ва ойни кўрмайдилар. Кеча ва кундузни билмайдилар. Бу йилги Рамазон уларга ярани янгиланиши, кўз ёшининг қалқиши ҳамда аччиқ ҳасратдан ўзга нарсани олиб келмади.

Сиз эса энг кучга тўлган, яшнаган чоғингиздасиз.

Айтингчи, сиз бу неъматлар соясида, бунга ўхшаш марҳаматлар муқобилида нима қилмоқчисиз?



Ислом Нури

Бу йилги Рамазон мусулмон ўлкаларда кўриниб турган қайғу ҳасратлар ва ашаддий зулмат қоплаган ҳолда кириб келмоқда.

Рамазон келди, ҳолбуки бу уруш мусулмон юртларда ёрдам берувчи тополмай кўзларидан ёш тирқираётган етимни қолдириб кетган. Бу уруш боқувчисидан айрилиб, кечаларни ой билан бирга уйқусиз ўтказаетган оилани ҳам қолдирганки, у егулик сўраб ё кийгулик излаб бутун мусулмонларга дардини айтиш учун тонг ёришини кутмоқда.

Сиз эса ўз юртингизда хотиржам, ҳаётингизда ором, барча шодликларингиз билан масрурсиз. Айтингчи, бу муборак ташриф билан сиз нима қилмоқчисиз?

Навқирон биродарим, гуноҳ-маъсиятга журъат этиш, унга киришиш хотиманинг ёмон бўлиш сабабларидан биридир — Аллоҳ сизни бундан асрасин!

Ибн Қаййим раҳимаҳуллоҳ буни баён этиб шундай дейди: «Гуноҳларнинг жазоларидан яна шуки, улар банда ўз нафсига энг муҳтож бўлган пайтда хиёнат қилади. У ерда бунданда хавфлироқ, аччиқроқ, қўрқинчлироқ нарса борки, у ҳам бўлса банданинг қалби ва тили ўлим келиб, Аллоҳ ҳузурига кетаётган вақтда унга хиёнат қилишидир. Калимаи шаҳодатни айтиш имконсиз бўлган ҳолатларни кишилар кўп учратган, ўз кўзлари билан кўришган. Ҳатто улардан бирига «Ла илаҳа иллаллоҳ» де, дейилганида, “Оҳ! Оҳ! Буни айтолмайман!” деган экан. Яна бошқа бирига айтилганда: «Бу айтаётганинг менга фойда бермайди, мен қилмаган ҳеч бир гуноҳ қолмади» деб, калимаи шаҳодатни айта олмай ўлиб кетган. Бошқасига «Ла илаҳа иллаллоҳ» де, дейилганда «Фойдаси йўқ, Аллоҳ учун бирор марта намоз ўқиганимни билмайман» деб, айтолмай ўлган.



Ислом Нури

Гуноҳда давом этиш оқибати ачинарли бўлган бу каби аянчли ҳолатлар билан якунланади, Аллоҳ сизу бизни Ўзи асрасин.

Кимки бу оқибатлардан ибрат олган бўлса, ўз ҳолига боқиб фурсатни бой бермасдан нафсини сарҳисоб қилади.

Қанчадан қанча гуноҳлар борки, вақт ўтиши билан инсон уни хуш кўрадиган бўлиб қолади, унинг одатига айланади, унга боғланиб қолади. Ҳатто эртаю кеч унинг фикрига маҳкум бўлиб, хилватларда у билан суҳбат қуради.

Ана шу ҳол зиёдалашиб, бутун ҳаётида шу билан танилиб қолганида тўсатдан йўлда бир ҳодиса сабаб ўлим фожиаси бўлади. Бирдан у ўлим талвасасида ўзи боғланиб қолган шаҳватни такрор-такрор айта бошлайди ва шу ҳолатда жон таслим қилгунча давом этади.

Бундай ютқизиқдан «Иннаа лиллаҳи ва иннаа илайҳи рожиуун» деймиз.

Навқирон биродарим, Рамазон ўзи ҳақида айтилган буюк ҳадислар билан кириб келмоқда. Мана бу ҳадисда Набий соллаллоҳу алайҳи ва саллам айтадилар: *«Рамазон кирса, жаннат эшиклари очилади, дўзах эшиклари бекилади, шайтонлар кишанланади»*. Жаннат эшиклари очилган бу ойда унинг кундузини рўза тутиш билан ғанимат билиб фойдалансак, биз учун нақадар муносиб иш бўлади. Унинг фазли ҳақида Расулulloҳ соллаллоҳу алайҳи ва саллам дедилар: *«Ким Рамазонда иймон билан, Аллоҳдан ажр умид этиб рўза тутса, ўтган гуноҳлари мағфират қилинади»*. Аллоҳнинг уйларида мусулмонлар жамоаси билан кечаларни қиёмул-лайл намози билан ўтказсак катта фойдага эришамиз. Унинг фазли ҳақида ҳам Набий соллаллоҳу алайҳи



ва саллам дедилар: «*Ким Рамазонда иймон билан, Аллоҳдан ажр умид этиб қиёмул-лайл қилса, ўтган гуноҳлари мағфират қилинади*».

Агар аксинча маъсиятга ҳарис бўлсангиз, тоатдаги камчиликда муқим турсангиз, у ҳолда сиз билан ҳидоят ўртасини тўсиб қўйилишидан қўрқаман ва бу вақтда сиз жуда катта зиён кўрасиз.

О, кошки тоат замонлари ўтиб кетишдан олдин ғафлатидан уйғонадиган кишини кўрсам! Чунки фойданинг ҳам, тижоратнинг ҳам ўз кунлари, ўз вақтлари бор.

Ҳақиқий зиёнкор фазилатларни қўлдан бой бериб, Аллоҳга қуруқ орзулар қилган кимсадир. Эҳтиёт бўлинг! Эҳтиёт бўлинг!

Ва ниҳоят навқирон биродарим, ҳузурингиздаги ушбу рисоламни сизга йўллашга ундаган нарса фақат азиз шахсингизга бўлган тўлиб тошган муҳаббат туйғулари ва ушбу сатрлардан сўнг ўтган кунларингиздан яхшироқ бўлишингизга умидларни дилимда алангалатган орзугинадир.

Аллоҳ таоло сизни ҳифзу ҳимоясига олсин. Айбларингизни бекитсин. Сизнинг тавбангиз ва салоҳиятга қайтишингиз билан умматингиз кўзини қувонтирсин. Албатта У энг сахий сўралгувчи Зотдир.

Биродарингиз Мишъал ибн Абдулазиз Фаллоҳий

Мактубни Абул Фазл таржима қилди

Манба: www.islomnuri.com